

# Islam Di Antara Kejahilan Pemeluknya, dan Kelemahan Ulamanya

(IV)

Hingga setakat ini pengarang makalah di atas masih lagi membahaskan soal-soal mengenai perbandingan di antara *sharī'ah Islāmiyyah* dengan undang-undang negara yang diciptakan oleh manusia. Ikutilah terus bahas-bahasan yang bermutu tinggi ini mudah-mudahan kita sama-sama mendapat manfaatnya – Pengarang.

(Terjemahan bebas oleh: Azmi)

## **Pertentangan Asas Di Antara**

### **Syariat dan Undang-undang:**

Pertentangan asas di antara *sharī'ah Islāmiyyah* ciptaan Tuhan dengan undang-undang hidup ciptaan manusia terdapat dari tiga jurusan:

#### **Jurusan Pertama:**

Adapun *sharī'ah Islāmiyyah* dicipta dan diturunkan oleh Allah *Subhānahu wa Ta'ālā*. Tetapi undang-undang negara adalah dicipta dan direka oleh manusia. Kedua-duanya menggambarkan kelebihan atau kekurangan sifat-sifat yang menciptakannya. Undang-undang negara itu diciptakan oleh manusia yang bersifat lemah dan kekurangan, maka sudah tentu akan didapati peraturan-peraturan dan hukum-hukum yang terkandung di dalam undang-undang negara itu beberapa unsur-unsur kekurangan dan kelemahan, oleh itu sesuatu peraturan dan tiap-tiap hukum yang didapati di dalam undang-undang negara itu pasti akan menerima perubahan, atau boleh juga dinamakan menerima perkembangan-perkembangan menurut suasana masyarakat dan pergolakan zaman. Ketika didapati suasana atau keadaan di dalam sesuatu masyarakat itu

berubah, maka tak dapat tidak peraturan-peraturan yang berada di dalam undang-undang itu juga akan turut berubah, dia sudah menjadi suatu peraturan yang tidak sesuai lagi dengan perubahan-perubahan masyarakat yang baru mendatang itu, kerana undang-undang ciptaan manusia itu sentiasa bersifat kekurangan, bagaimana sifat-sifat kekurangan yang ada pada penciptanya. Selagi manusia pencipta undang-undang itu tidak boleh bersifat kesempurnaan, maka selama itulah undang-undang yang mereka ciptakan tidak akan sempurna dan lengkap. Perkara-perkara yang akan berlaku tidak boleh dijadikan suatu peraturan oleh undang-undang ciptaan manusia. Ia hanya dapat mengatur perkara-perkara yang telah berlaku.

Adapun *sharī'ah Islāmiyyah* yang menciptakannya ialah Allah *Subhānahu wa Ta'ālā*, sudah tentu di dalamnya tergambar sifat-sifat kesempurnaan, kebesaran dan kekuatan Maha Penciptanya. Oleh itu ia menjadi suatu syariat yang lengkap dan sempurna bersesuaian untuk digunakan pada setiap waktu dan zaman dengan tidak menerima perubahan-perubahan, sama ada pada masa yang

telah lalu, sekarang, mahupun pada masa yang akan datang.

#### **Jurusan Kedua:**

Setiap undang-undang dunia itu merupakan sesuatu peraturan sementara, peraturan yang direka oleh segelintir manusia yang terdiri dari para sarjana dan ahli-ahli fikir bagi mengatur keperluan hidup mereka sehari-hari, undang-undang negara suatu peraturan yang telah ditinggalkan oleh zaman di dalam sesuatu masyarakat atau ia setanding dengan keadaan masyarakat hari ini tetapi ia akan bertentangan dengan masyarakat di zaman akan datang kerana setiap undang-undang direka manusia itu perubahannya tak secepat perubahan yang berjalan di dalam sesuatu masyarakat. Undang-undang berubah setelah keadaan sesuatu masyarakat berubah, ia mengikuti perkembangan dan pergolakan sesuatu masyarakat. Tegasnya sekali lagi saya katakan undang-undang ciptaan manusia itu merupakan suatu peraturan buat sementara waktu yang berjalan buat sementara waktu di samping perkembangan di dalam sesuatu masyarakat. Ia pasti akan berubah

bersama-sama dengan perubahan keadaan sesuatu masyarakat.

Adapun *sharī'ah Islāmiyyah* yang menciptakannya ialah Allah buat digunakan untuk selama-lamanya, bagi mengatur soal-soal yang berhubung dengan agama dan masyarakat hidup manusia. Syariat dan undang-undang mempunyai tujuan yang satu dalam soal mengatur masyarakat. Tetapi syariat bertentangan dengan undang-undang dari segi peraturan dan hukum-hukumnya yang sesuai dijalankan pada setiap masa dan setiap zaman. Ia bersifat lengkap dan sempurna tidak menerima sebarang perubahan. Keistimewaan di antara *sharī'ah Islāmiyyah* dengan undang-undang keduniaan dapat dilihat dengan jelas dari dua segi:

Pertama: *Nuṣūṣ* atau nas-nas yang terkandung di dalam *sharī'ah Islāmiyyah* bersifat umum dan lunak lembut bersesuaian dengan kemahuan jiwa masyarakat walau bagaimana panjangnya umur sesuatu masyarakat itu, walau bagaimana pesatnya perkembangan yang berlaku dan dan walau bagaimana banyaknya hajat yang diperlukan oleh masyarakat itu.

Kedua: Kaedah-kaedah hukum-hukum yang terkandung di dalam *sharī'ah Islāmiyyah* dan nas-nas keterangan yang dibawanya adalah bermutu dan bernilai tinggi sekira-kira tidak boleh ditinggalkan oleh sesuatu zaman yang datang dan pergi. Ia tetap selamanya bersesuaian dengan keadaan sesuatu masyarakat yang dibina oleh manusia.

Pada hakikatnya segala pemikiran manusia yang menuju kepada kebaikan dan kemajuan di dalam sesuatu masyarakat selalu tidak bertentangan

dengan segala peraturan dan hukum yang terkandung di dalam *sharī'ah Islāmiyyah*, kerana sebagaimana yang telah dikatakan tadi bahawa keterangan-keterangan dan nas-nas yang dibawa oleh *sharī'ah Islāmiyyah* adalah bersifat umum dan lembut. Ia adalah sebuah syariat yang tinggi mulia lantaran ia diciptakan oleh Tuhan yang Maha Berkuasa.

Syariat Islamiyyah telah diturunkan oleh Penciptanya ke alam dunia ini lebih daripada 13 abad lamanya, masa yang selama 13 abad itu telah menerima berbagai-bagai perubahan, perkembangan-perkembangan pendapat dan ilmu pengetahuan telah bergolak dengan hebatnya selama 13 abad itu bermacam-macam rekaan baharu yang ganjil dan menghairankan telah diciptakan oleh akal manusia, dalam masa tersebut undang-undang, peraturan dan tata tertib hidup ciptaan manusia telah beberapa kali pula bertukar ganti untuk menyesuaikan dengan keadaan zaman yang sentiasa menerima perubahan dari suatu masa ke suatu masa. Selama keadaan zaman berubah maka selama itulah peraturan-peraturan dan undang-undang yang diciptakan oleh manusia akan bertukar ganti. Undang-undang dan peraturan-peraturan yang telah digubal dan disusun oleh para sarjana. Di zaman beberapa abad yang silam sudah tidak dipakai lagi pada zaman ini seolah-olah perhubungan di antara dua zaman itu sudah terputus sama sekali.

Tetapi bersalahan sekali dengan keadaan *sharī'ah Islāmiyyah*; *sharī'ah Islāmiyyah* sekali-kali tidak menerima perubahan, ia tetap dengan segala hukum dan peraturan-peraturan dari sejak hari ia diturunkan hingga ke Hari Kiamat. Peraturan-peraturan yang terkandung

di dalamnya tetap lengkap dan kemas tetap bersesuaian dengan masyarakat hidup manusia di setiap waktu, menjaga keselamatan hidup mereka pada setiap masa dan menjamin ketenteraman dan keamanan berumah tangga<sup>1</sup> mereka pada setiap zaman.

Inilah kami bawakan beberapa contoh yang tepat jitu yang mana contoh-contoh tersebut akan membayangkan akan hakikat syariat Islam yang sebenarnya. Tiada suatu contoh yang lebih menarik hati dan meruntun jiwa selain daripada nas-nas yang dipetik daripada ayat-ayat suci al-Qur'an al-Karim. Mari kita ambil contoh beberapa potong daripada firman Allah di dalam al-Qur'an al-Karim:

1 – Firman Allah di dalam sūrat Āli 'Imrān<sup>2</sup> ayat (159): “*Wa shāwirhum fi al-amr*”. Ertinya: Mereka bermesyuarat di dalam sesuatu urusan.

2 – Firman-Nya di dalam sūrat al-Shūrā ayat (38): “*Wa amruhum shūrā baynahum*”. Ertinya: Urusan mereka (dilakukan) dengan permesyuaratan di antara mereka.

3 – Firman-Nya lagi di dalam sūrat al-Mā'idah ayat (3)<sup>3</sup>: “*Wa ta'āwanū 'alā al-birri wa al-taqwā wa lā ta'āwanū 'alā al-ithmi wa al-'udwān.*” Ertinya: Bertolong-tolonganlah kamu atas jalan kebaikan dan takwa dan jangan kamu bertolong-tolongan atas jalan dosa dan permusuhan. Dan sabda Rasulullah *ṣallā Allāhu 'alayhi wa sallam*: “*Lā ḍarara wa lā ḍirāra fī al-Islām*” ertinya: Tidak merbahaya dan tidak membahayakan di dalam agama Islam.

Inilah beberapa nas daripada al-Qur'ān dan hadith Nabi yang menunjukkan

<sup>1</sup> Perkataan sebenar ialah berumah tangga.

<sup>2</sup> Perkataan sebenar ialah Āli 'Imrān.

<sup>3</sup> Perkataan sebenar ialah 2

bagaimana lembutnya dasar-dasar hukum Islam terhadap umum. *Sharī'ah Islāmiyyah* mengutamakan “*shūrā*” (permesyuaratan) dijadikan sebagai asas sesuatu hukum, yang mana dengan dasar *shūrā* itu akan dapat mengelakkan masyarakat umat Islam daripada terceburlah ke jurang bahaya dan dosa.

Di samping itu dasar yang kedua setelah mengadakan permesyuaratan ialah menanamkan semangat kerjasama dan perasaan gotong-royong ke dalam jiwa setiap kaum Muslimin dan takwa terhadap Allah *Subhānahu wa Ta'ālā*. Dengan dasar-dasar inilah yang menjadikan Islam suatu agama yang mengandungi ajaran-ajaran suci yang bermutu dan bernilai tinggi yang tidak akan terdapat di dalam lain-lain agama yang diciptakan oleh manusia.

#### **Jurusan Ketiga:**

Adapun tujuan *sharī'ah Islāmiyyah* itu diturunkan ialah untuk mengatur masyarakat hidup manusia dan memberikan pertunjuk mereka ke arah jalan yang lurus dan benar, selain dari itu berusaha untuk menjadikan setiap anggota masyarakat sebagai manusia yang berguna yang dapat mendirikan negara yang berdaulat di dalam sebuah alam yang aman tenteram.

Oleh yang demikian segala ayat-ayat suci berupa *nusūṣ* yang diturunkan Tuhan kepada manusia adalah mengandungi pengajaran-pengajaran yang tinggi mulia serta bermutu melalui dari sejak masa ia diturunkan hingga ke hari ini. Pengajaran-pengajaran yang diturunkan Allah itu dikumpul dan dihimpunkan sehingga menjadi sebuah kitab suci yang dinamakan al-Qur'an al-Karim. Al-Qur'an menjadi sebuah

undang-undang Islam yang mengandungi *sharī'ah Islāmiyyah* yang lengkap sempurna, membawa pengajaran-pengajaran suci untuk dijadikan panduan hidup oleh manusia-manusia yang mempercayai akan kebenarannya. Kelengkapan-kelengkapan hukum Islam yang terkandung di dalam kitab suci al-Qur'an al-Karim tidak dapat ditandingi oleh mana-mana kitab suci yang menjadi undang-undang di dalam agama-agama yang lain.

Untuk membahas dan mendalami pengajaran-pengajaran Islam yang terkandung di dalam al-Qur'an bukanlah suatu perkara yang mudah, ia dihajati kepada pengorbanan masa yang agak lama. Meskipun demikian seluruh penduduk alam hingga ke hari ini belum lagi dapat mengetahui akan rahsia-rahsia ayat-ayat yang berbentuk hukum dan ilmiah yang dibawa oleh al-Qur'an al-Karim, oleh yang demikian maka Allah *Subhānahu wa Ta'ālā* mengutus seorang rasul bagi menerangkan segala tujuan yang dimaksudkan oleh satu-satu ayat yang termeterai di dalam al-Qur'an al-Karim agar manusia mendapat pertunjuk ke arah jalan kebajikan dan taat, membawakan jiwa mereka ke arah keimanan yang sempurna dan kepercayaan yang bersih, hingga mereka betul-betul dapat merasakan ketinggian mutu syariat dan pengajaran-pengajaran agama Islam yang mereka anuti.

Adapun undang-undang negara yang diciptakan oleh manusia itu meskipun pada asalnya bertujuan untuk mengatur masyarakat tetapi ia tidak menjamin untuk memimpin mereka ke arah kesempurnaan hidup. Di samping itu kita mengetahui bahawa undang-undang negara itu datangnya selalu terkemudian daripada munculnya sesuatu

masyarakat dan ia sentiasa mengikuti perkembangan-perkembangan yang berlaku di dalam sesuatu masyarakat, oleh itu undang-undang negara selalu berubah-ubah dan bertukar ganti dari suatu ke suatu masa serta menyeleweng daripada tujuan asalnya, akhirnya ahli-ahli fikir, cerdik pandai dan sarjana-sarjana undang-undang mulai mengubah dasar undang-undang mengikuti dasar *sharī'ah Islāmiyyah* iaitu mengatur dan memimpin masyarakat ke arah penghidupan yang lebih sempurna dan berdisiplin.

Sekarang banyak kita dapati beberapa buah negeri – bukan Islam – yang menukar dasar undang-undangnya mencontohi dasar *sharī'ah Islāmiyyah* menyeru dan memimpin rakyat ke arah sesuatu kepercayaan atau pegangan (isme) yang tentu, begitu pula undang-undang negara itu digunakan pula untuk melaksanakan sesuatu tujuan yang tertentu – sebagaimana yang pernah dilakukan oleh negeri-negeri Rusia, German, Itali dan lain-lain lagi.

Begitulah pada akhirnya undang-undang negara telah banyak mengikuti jejak *sharī'ah Islāmiyyah* pada dasar dan peraturannya, dalam segi dan jurusan pemerintahan. Ini menunjukkan bahawa *sharī'ah Islāmiyyah* adalah sebuah syariat yang mengatasi undang-undang keduniaan dari sejak ia diturunkan ke alam dunia ini sejak tiga belas abad yang silam.

Bersambung.

---

#### **Kata-kata Hikmah**

Mengatur urusan sebelum dikerjakan itu, menyelamatkan kamu daripada penyesalan.